

# INUIT ATAQATIGIIT

## Inatsisartuni



UKA 2020/66

10.11.2020

Mikivusuk Thomassen

**Nannunik piniarneq illersuinerlu pillugit Namminersorlutik Oqartussat nalunaarutaat<sup>1</sup> allanngorteqqullugu Naalakkersuisut peqquneqarnissaannik Inatsisartut aalajangiiffigisassaattut siunnersuut. Taamaalilluni nannunik inuit najugaqarfiinut pisunik pisarinnittoqarsinnaanngorlugu, pisaqarnissaq sioqqullugu immikkut akuersisummik peqqaangikkaluarluni.**

(Inatsisartunut ilaasortaq Jens Napätôk' Partii Naleraq)

Siullertut qujarusuppunga saqqummiunneqartumut.

Nunatsinni inoqarfiit siammasissuupput, piniakkallu killilersukkat piaqqisarfiit sumiiffimmi assigiinngillat nerisasaqarniarnertillu pillugu sumiiffinnaaqarlutik. Uumasut qaasuttut illoqarfiit iluikut appakaassinnaasarpuk tamannalu uloriartorsiortitsinermik kinguneqarsinnaasarpuk ilaatigullu qimaassinneqarnermikkut iluatsittarlutik tamatiguunngitsorli. Illoqarfiit killeqarfiinut appakaattoqartillugu innuttaasut toqqissisimajunnaartarpuk aammalu ulorianartorsiutsitisarlutik.

Saqqummiisup ilaatigut eqqaavai uumasut qaasuttut illoqarfimmuk appakaakkaagata pisortaqarfippassuit attavigeqqaarlugit aatsaat qanoq pisoqarsinnaanera aaliangerneqartoq, tamannalu tulluarunnaarsimasoq oqaatigissavara. Ulorianartorsiortarnerit nunatsinni piffissami kingullermi qujanartumik inuttaasunik sulit inuunermik uloriartorsiutsitisisoqanngillat, isumaqarpunga uumasut qaasuttut inoqarfinnut appakaattartut allaffeqarfippassuit aqqusaartunngikkaluarlugit eqaannerusumik sullissisinnaaneq ujjartorneqartariaqartoq. Naalakkersuisoqarfiit, Kommunit, Nunaqarfinni aqutsisut, Piniartut peqatigiiffii, erseqqilluinnartunik malitassaliortariaqarpuk, tassami pisussaaffeqarpugut innuttaasut illersorneqarnissaannik aammalu ulorianartorsiortoqannginnissaannik.

Pitsaasumillu aaqqiissuteqassagutta piniartutut inuussutissarsiuteqartut peqatigilluinnarnissaat assortorneqarsinnaanngilaq, taakkuummata ilisimasaqarluartut ukiorpassuarni piniakkatik malinnaaffigisuugamikkut, aammalu

# INUIT ATAQATIGIIT

## Inatsisartuni



uumasut qanoq issusaannik ilisimasaqarluartuummata. Assortoruminaappoq inoqarfinnut piniakkat qaasuttut appakaattarneranni pisorta qarfippassuit aatsaat aqqusaaqqaarlugit aaliangiisarnerat pitsaasuunnginnerat, allaat ullut arlerlugit utaqqisinneqartarneq. Tamannalu piaartumik aqqinneqartariaqarpoq, tassami ukiuni kingulerni takussaaleralluttuinnarput uumasut inoqarfinnut nerisassarsiorlutik qaninngoortut, ilaatigut silap allanngoriartorata sunniuitaanik uumasut ingerlaarfiisa allanngornerannik takussutissartaqarluni.

Erseqqissaatigerusuppara Naalakkersuisut akissutaanni takuneqarsinnaavoq piniarnermik nakkutilliisut inoqarfillit tamarmik nakkutilliisoqanngitsut, tamannalu uggornartuuvoq aqqinneqartariaqatoq ajornanngippat piniartoqarfuit tamarmik nakkutilliisoqartariaqarpoq. Eqqaaneqarpoq inoqarfiit kommunefoged-iqanngitsut aammannalu ilungersunarpoq. Taamaasillunilu ikioqatigiilluarsinnaaneq pisinnaasarani. Pissutsit malitassallu erseqqissuunngitsut iliuuseqarfigisariaqarpagut.

Ilisimavarput Politiit suliassarpassuarnik allanik suliaqartorujussuussut tamannalu nalilersoqqinneqartariaqartoq isumaqarpunga suliassaammi taama annertoreertsigisut qaavatigut piniakkanik qaasuttunik suliakkiinnarneqarsinnaanerat nalilersorneqartariaqarpoq, pitsaasumik sinnerfilimmik nunap inui ilisimasaqarluartut atorineqarsinnaagaluarput. Politiit suliaat ataqqilluinnarpakka, taakkuummatami ikiortigilluartaqqagut inoqarfinni sumiluunniit, unali aallannissinnaanernut tunngasortaa tikikkusukkiga qimaatissinnaaneri iluatsinngikkaangata piniartutut allagartallit atorineqarneqajorneri.

Piniartutut inuussutissarsiuteqartut ataqqilluinnarpakka piniakkaminnik ilisimasaqarluartuummata nakkutiginnilluartuullutillu paarsilluartuummata, kaammattuutigerusuppara piniakkat killilersukkat pillugit suleqatigineqarnerusariaqartut. Piniartugut oqartussaniit allaniillu ataqqineqarnerusariaqartut, tassami piniartutut inuussutissarsiorneq imaaginnanngilaq, tassaannaanngillat inuussutissaqarnerinnaq aningaasarsiorsinnaanerlu kisiisa pillugit piniartuusut, aammali tassaapput qanga siulitsinniit inooriaaseq piniariaaserlu ataqqilluinnarlugit inuusut.

Inuit Ataqtiginiit isumaqarpugut siunnersuut manna peqqissaarullugu suliarineqartariaqartoq, tamannalu anguneqassappat piniartutut inuussutissarsiuteqartut suleqatigineqarluinnartariaqartut, aamma piniartutut

# INUIT ATAQATIGIIT

## Inatsisartuni



inuussutissarsiuteqartut piniakkanik killilersukkanik aaliangersaasarneq pineqartillugu suleqatigineqarluinnartarnissaat allaqqunneqarsinnaanngimmat. Tassami maani inersuarmi qinikkat piniakkat killilersukkat pillugit assortuutiinnarsinnaanngilat, piniartutut inuussutissarsiuteqartut peqatiginiartigit, piniakkaminnik ilisimasaqarluartuummata silallu anngoriartorneranut malinnaaluartuummata.

Soorunami aamma allat susasaqartut suleqatigineqarnissaat avaqqunneqarsinnaanngilaq, ass. uumasorsiuut, tassami paaseqatigiinnissaq pingaaruteqarluinnarpoq.

Taamatut oqaaseqarluta Avatagiisinut Eqqissisimatitsinermut ataatsimiititaliamut innersuupparput.